

Kerb unn Kerweborsch 1954

Kerweborsch?

Jo!

Wem geheerd die Kerb?

Unser!

Wem geheerd de Plunser?

Unser!

Sauft ihr noch wie immer?

Noch viel schlimmer!

Sauft ihr noch wie sunnst

Umsunnst!

Kerweborsch?

Jo!

Im Jahr 1954, also vor 69 Jahren, war mir vumm Jahrgang 1935 Kerweborsch unn de Toni war unsern Kerwebvadder unn Vorsänger, also unsern Vorrufer. Unn immer, wenn de Toni „Kerweborsch?“, gerufe hott, hawwe mir Kerweborsch dem Toni Antwort gewwe. Unser Kerwebfarwe warn Blau-Gelb, die hadde merr uff de Kabb, uff de Schärp unn uff unsere Kerwebfohn, die war blau unn hadd enn gelwe Wappe mett emm Bembel unn emm Schinke druff.

Mir warn 41 Kerweborsch unn was hawwe mir ferr e Kerb gefeiert! Mir hadde enn große Kerwebboom außem Wald gehold, hadde den onnere Eck vumm Gasthaus Herrsch festgebunne unn e Kerwebobb droogehängd. Im große Saal vumm Herrsch, dens doomols noch gewwe hott, hadde merr die Biehn komplett zugebaut mett emm Gadder voller Babierrose. Hunderde, ach villeischd e paar dausend Rose hadde merr geknibbeld unn weil de Alfred joo aach bei de Kerweborsch gewese iss, beim Friseur Schleidt in de Frisierstubb. Die Kedda Spillmonn, die Frau Helmecke unn die unvergessene Lalas Lene hawwe unns debei geholfe, unnerdesse hott uns die Schitzentille mett Worschdebrot gefidderd, e groß Konn Ebbelwoi hott immer uffem Disch gestonne, Wasser war nor im Moo.

Mett dene Rose hawwe merr awwer nitt nor die Biehn geschmiggd, naa, aach de Umzuuch-Leiderwaache vumm Mitter, gezooche vunn zwaa Gail, war ringserum mett Rose behängt. Den Waache hadde merr gebrauchd ferrs Rennomee unn de Transport vunn emm Ebbelwoifass, was gons hinne omm Waache festgemachd gewese iss, unn jeder vunn de Kerweborsch, dem soin Ebbelwoikruuch leer worn iss, hott den dort noochfille kenne. Aach enn Kerwebommel hadde merr debei unn dasser uns nitt abhaut bei dem gonse Truwel uff de Gass, hadde merr den in enn Hondkarrn geleschd unn festgebunne. Die Woch zwische Kerb unn Noochkerb warn merr jeden Owend innere onnern Wertschaft, ess hott joo genuuch in Flerschem gewwe.

Onn Noochkerwebomondaach hawwe merr innem Umzuuch dorsch Flerschem die Kerwebobb zum Verbrenne onn de Moo gebroochd. Vill Leit hawwe uns zugeguggd, unner onnere e jung Mäde außem Westerwald, die sich onn dem Daach sicher nitt hott vorstelle kenne, dass mett oom vunn dene Kerweborsch emol iwwer finfunnsechsisch Jahr verheirat iss.

Eiern Honnes